

# Ilinniarnertuunngorniarfimmi ilinniartitsissutit ataasiakkaat, ilassutitut ilinniarnerit imminullu ilinniartittarneq pillugit Namminersorlutik Oqartussat nalunaarutaat

Ilinniarnertuunngorniararneq pillugu Inatsisartut inatsisaanni nr. 13, 22. november 2011-meersumi Inatsisartut inatsisaat nr. 4, 30. maj 2014-imeersukkut aamma Inatsisartut inatsisaat nr. 31, 9. december 2015-imeersukkut allangortinneqartumi § 1, imm. 4 aamma 6, § 1a, imm. 2 aamma § 54, imm. 2 naapertorlugit aalajangersarneqarput:

## Kapitali 1

### *Nassuiaatit siunertallu*

#### *Ilinniartitsissutit ataasiakkaat*

**§ 1.** Ilinniartitsissutit ataasiakkaat nalunaarummi matumani tassaatinneqarput ukiut 3 angullugit sivirususilimmik ilinniarnertuunngorniarfimmi ilinniartitsissummik ataatsimik arlalinnilluunniit pikkorissartitsinerit aamma inunnet ilisimasaqarnermik, itisilerinermik, ungavarluni isiginneriaaseqarnermik takorluuisinnaanermillu soqutigisaqartunut sammitinneqartut kiisalu ingerlaqqiffiusumik ilinniagaqarnissaq pingaarnertut siunnerfigalugu nalinginnaasumik peroriartuutaasumik aamma ilinniagaqalernissamat piareersaataasumik ilinniagaqarnerit. Pikkorissarnerup qanoq sivirusitiginissaanut apeqqaapput ilinniartitsissutit ataasiakkaat suuneri aamma ilinniarnertuunngorniarfiup neqeroorutaasa suuneri.

*Imm. 2.* Ilinniartitsissutit ataasiakkaatut neqeroorutigineqarsinnaapput:

- 1) ukiuni pingasuni ilinniarnertuunngorniarnerup ilaattut ilinniartitsissutit ataaseq arlalilluunniit,
- 2) ilinniartitsissutit arlallit ilinniarnertuutut soraarummeerutaasinnaasut,
- 3) ilinniartitsissutit (ilinniartitsissutit ataatsimoortut) Kalaallit Nunaanni sivikitsumik akunnattumillu sivirususilimmik ingerlaqqilluni ilinniarnissamat isissutaasinnaasut, aamma
- 4) ukiuni pingasuni ilinniarnertuunngorniarnerup avataatigut ilinniartitsissutit ataaseq arlalilluunniit, tassunga ilangullugu immikkut aqqissuussamik ingerlatsineq.

*Imm. 3.* Ilinniarnertuunngorniarfimmi ilinniartitsissutit tamarmik ilinniartitsissutit ataasiakkaatut ilinniarneqarsinnaapput.

*Imm. 4.* Ilinniartitsissutit ataasiakkaat nuna tamakkerlugu piumasaqaataasut malillugit soraarummeernermik naggaserneqassapput.

*Imm. 5.* Soraarummeerneq ingerlaqqiffusumik ilinniartitaanernut malittarisassat malillugit ingerlaqqilluni ilinniarnissamut isissutaasinnaavoq.

**§ 2.** Ilinniartitsissutinik ataasiakkaanik ilinniartitsinermi siunertarineqarpoq ilinniartup ingerlaqqilluni ilinniaqarnissaanut imaluunniit suliffeqarfinni periarfissaqarnerulernissaanut tunngavissiisumik nalinginnaasumik peroriartornissaa, ilisimasaqalernissaa piginnaasaqalernissaalu. Ilinniartitsineq ukiuni pingasuni ilinniarnertuunngorniarnermi ilinniartitsissutinut ataasiakkaanut assinguvoq taamalu atuagarsornermut atuinissamullu sammitinneqarluni. Ilinniartoq suliatigut perorsaanikkullu inerisarneqarnermigut sulianik itisiliisinnaanermut ilinnialernissamullu piginnaanngorsarneqassaaq.

**§ 3.** Ilinniartitsissutinik ataasiakkaanik ilinniartitsinermi ilinniarnertuunngorniarnermi malittarisassat nalunaarutikkut matumuuna allannguutitaqartinneqartut malinneqassapput.

#### *Illassutitut ilinniarnarit*

**§ 4.** Illassutitut ilinniarnarit nalunaarummi matumani tassaatinneqarput ukiut 3 angullugit pikkorissarnerit, siunertarineqarluni ilinniartut ilinniarnertuutut naammassisimasut ingerlaqqillutik ilinniaqarnissamut aalajangersimasumik ilinniagaqalernissamut naammassinninnissamullu naammaginarumik tunngavissaqalernissaasa qulakkeerneqarnissaa.

*Imm. 2.* Illassutitut ilinniagaqarnermi ilinniartitsissutit ataasiakkaat imaluunniit ilinniartitsissutit ataatsimoortut ilinniarneqarsinnaapput.

*Imm. 3.* Illassutitut ilinniagaqarneq nuna tamakkerlugu piumasaqaataasut malillugit soraarummeernermik naggaserneqassaaq.

*Imm. 4.* Soraarummeerneq ingerlaqqiffusumik ilinniartitaanernut malittarisassat malillugit ingerlaqqilluni ilinniarnissamut isissutaasinnaavoq.

**§ 5.** Illassutitut ilinniaqarnissamut ilinniartitsinermi ilinniarnertuunngorniarnermi malittarisassat nalunaarutikkut matumuuna allannguutitaqartinneqartut malinneqassapput.

#### *Imminut ilinniartittarneq*

**§ 6.** Nalunaarummi imminut ilinniartittarneq tassaatinneqarpoq:

- 1) Inuit ukiuni pingasuni ilinniarnertuunngorniarnermi nalunaarsimasut aamma ilinniarnertuunngorniarnermi ilinniartitsissummi pineqartumi ilikkagassanut pilersaarut malillugu ilinniartitsissummik ataatsimik arlalinnilluunniit misilitsinnissamut nalunaarsimasut.
- 2) Ilinniarnertuunngorniarnermi ilinniartut ilinniarnertuunngorniarnermi ilinniarnermut ileqqorissaanermullu malittarisassat pillugit Namminersorlutik Oqartussat nalunaarutaanni § 9, imm. 1, nr. 6 naapertorlugu imminnut ilinniartittussatut innersuunneqartut.
- 3) Ilinniarnertuunngorniarnermi ilinniartut ilinniarnertuunngorniarnertarneq pillugu Inatsisartut inatsisaanni § 54, imm. 2 naapertorlugu nalunaarsimasut ilinniarnerminnik imaluunniit ilinniarnermik ilaanik nammineerluni ilinniarnertut ingerlatsiumallutik.

*Imm. 2.* Imminnut ilinniartittut neqeroorfigineqassapput ilinniakkat pillugit ilitsersorneqarnissamik,

tassunga ilanngullugu ilinniarnertuunngorniarfinni misilitseriaatsit ilinniartitsinerullu imai pillugit paasissutissinneqarnissamik. Imminnut ilinniartittunut ataasiakkaanut eqimattakkaanulluunniit ilitersuisoqarsinnaavoq. Ilitersuineq ilinniartitsissummut nalunaaqqaarnermi ilinniartitsissummut ataatsimut 1 tiimimik naleqarpoq.

§ 7. Imminnut ilinniartittut ilinniarnertuunngorniarfinni ilinniartitaanernut malittarisassatut aalajangersarneqartut nalunaarut manna aqcutigalugu allannguutitaqartut malissavaat.

## Kapitali 2

### *Neqeroorneq inissanillu aqutsineq*

§ 8. Ilinniarnertuunngorniarfimmit imaluunniit ilinniarfimmit allamit tamanna pillugu qinnuteqartoqareerneratigut Ilinniartitaanermut Naalackersuisoqarfiup akuersissutigissavaa ilinniarnertuunngorniarfiup imaluunniit ilinniarfiup ilinniartitsissutinik ataasiakkaanik neqerooruteqarsinnaanera, ukiuni pingasuni ilinniarnermi aamma ilassutitut ilinniarnermi ilinniagassatut aaqqissuussaareersut saniatigut. Ilinniarnertuunngorniarfiup ilinniarfulluunniit Ilinniartitaanermut Naalackersuisoqarfimmut qinnuteqaammimi ilanngutissavaa akuersissut killilimmik ataavartumilluunniit atuutsikkusunerlugu.

*Imm. 2.* Qinnuteqaammik nalilersuinermi, tassunga ilanngullugu killilimmik ataavartumilluunniit atuutsitsisoqassanersoq nalilersuinermi pingaartinneqassaaq ilinniarnertuunngorniarfik ilinniarfilluunniit naammattunik inissaateqarnerseq, tassunga ilanngullugu ilinniarnermi atortussanik ilinniartitsissusanillu peqarnissaq aamma taakkua pillugit malittarisassat naapertorlugit ilinniartitsissutit ataasiakkaat ilassutitullu ilinniarnerit aaqqissuunneqarsimassapput.

*Imm. 3.* Ilinniarnertuunngorniarfiit ukiuni pingasuni ilinniarnertuunngorniarnermi ilinniartitsissutinut atuutereersunut tamatigut ilinniartitsissutinik ataasiakkaanik ilinniartussanik tamatigut tigusisassapput, taamaattoq takuuk § 10.

§ 9. Ilinniarnertuunngorniarfiup imaluunniit tassunga atatillugu ilinniarfittut akuerisaasup allap (ilinniarfissatut akuerisaq) ilinniartitsissutinik ataasiakkaanik ilassutitulluunniit ilinniagaqarnissamik neqerooruteqartartup ukiuni pingasuni ilinniarnertuunngorniarnermi klassinut atuutereersunut ilinniartut inississinnaavai, taamaattoq takuuk § 10, imm. 2-mi oqaaseqatigiit aappaat.

*Imm. 2.* Ilinniarnertuunngorniarfik ilinniarfilluunniit akuerisaasoq ilinniartitsissutinik ataasiakkaanik immikkut ilinniartussanik pilersitsinnaapput immikkut ilinniartussanik pilersitsinissamut naammaginartumik amerlassusillit qinnuteqarpata, tak. § 10, imm. 1.

*Imm. 3.* Ilinniarnertuunngorniarfik ilinniarfilluunniit akuerisaasoq immikkut ilassutitut ilinniagaqartussanik pilersitsinnaapput, qinnuteqartut uppersarsinnaappassuk ilinniagaq aalajangersimasumik ingerlaqqiffusumik ilinniagaqarnissamut atorneqartussaasoq, tak. § 15, imm. 3.

*Imm. 4.* Ilinniarnertuunngorniarfik ilinniarfilluunniit akuerisaasoq klassimik ilinniartitsissutinik ataasiakkaanik ataatsimoortunik ilassutitulluunniit ilinniagassanik ilinniagaqartussanik pilersitsinnaapput, klassimik pilersitsinissamut naammaginartumik amerlassusillit qinnuteqarpata, tak. § 10, imm. 2.

**§ 10.** Ilinniarnertuunngorniarfik ilinniarfilluunniit akuerisaasoq ilinniagaqatigiittussanik pilersitsisinnaapput, ilinniartut ikinnerpaamik arfineq pingasut ilinniartitsissutinik ataasiakkaanik ilassutitulluunniit ilinniagaqarnissamik aalajangersimasumik ilinniagaqarusuppata. Ilinniagaqatigiinni tamani ilinniartut amerlanerpaamik 24-usassapput, taamaattoq takuuk imm. 3.

*Imm. 2.* Ilinniarnertuunngorniarfik ilinniarfilluunniit akuerisaasoq klassimik pilersitsisinnaapput, ilinniartut ikinnerpaamik 16-it ilinniartitsissutinik ataatsimoortunik aalajangersimasunik ilinniagaqarusuppata, taamaattoq takuuk imm. 3. Klassini tamani ilinniagaqartut amerlanerpaamik 24-ussapput, taamaattoq takuuk imm. 3.

*Imm. 3.* Tamanna pillugu rektorip ilinniarfulluunniit akuerisaasup pisortaata qinnuteqareerneratigut Ilinniartitaanermut Naalakkersuisoqarfup immikkut ittumik pissutissaqartillugu akuersissutigisinnaavaa imm. 1-ip aamma 2-p avaqunneqarsinnaanera.

### **Kapitali 3**

#### *Ilinniartunngorsinnaaneq, akuerisaaneq qinnuteqartarnerlu*

##### *Iserfissaq*

**§ 11.** Ilinniartitsissutinik ataasiakkaanik ilinniarnissaq ilassutitullu ilinniarnissaq kimulluunniit qinnuteqarfup nalaani Kalaallit Nunaanni najugaqartumut ammavoq, taamaattoq tak. imm. 2 aamma 3.

*Imm. 2.* Qinnuteqartut siusinnerusukkut Kalaallit Nunaanni najugaqareersimasut, ilinniarnertuunngorniarluni ilinniakkamut qinnuteqarnermut naleqqiullugu Kalaallit Nunaanni najugaqavissutut isigineqassapput, Kalaallit Nunaata avataaniinnerat Kalaallit Nunaanni oqartussaasut peqataaffigisaannik isumagineqarnermik imaluunniit ilinniarnermik peqquteqarpat.

*Imm. 3.* Ilinniarnertuunngorniarluni ilinniagaq qinnuteqartunut Kalaallit Nunaanni najugaqavissuunngitsunut ammavoq, taakku nunat tamat akornanni isumaqatigiissutaasut, Kalaallit Nunaanni atuuttut, naapertorlugit Kalaallit Nunaannit qinnuteqartut assigalugit ilinniartunngorsinnaatitaappata.

##### *Ilinniartussanik tigusineq*

**§ 12.** Ilinniartitsissutinik ataasiakkaanik ilinniagaqarniaraanni piumasaqaataavoq ilinniakkamik ilinniartitsissutinik ataasiakkaanit appasinnerulaartumik ilinniartup malinnaasimanissaa imaluunniit malinnaanissaa.

*Imm. 2.* Ilinniartup ilinniartitsissutit aalajangersimasumik amerlassusillit ukiumi atuarfiusumi piffissaq tamakkerlugu ilinniarnermut naapertuuttut taamaallaat ilinniagassatut qinnutigisinnaavai.

*Imm. 3.* Ilinniartitsissutinik ataasiakkaanik ilinniagaqarnissamut qinnuteqartut ukiumi pingasuni ilinniarnertuunngorniarlutik qinnuteqartut inissaannik tigusisinnaangillat.

*Imm. 4.* Rektori imaluunniit ilinniarfimmik akuerisaasumi pisortap qinnuteqartut ilinniakkatigut piginnaasaannik nunallu immikkoortuini sumi ilinniagaqarusunnerannik ataatsimut nalilersuineq tunngavilugulu aalajangissavaa, tak. § 16, imm. 2, qinnuteqartut sorliit imm. 1-imi piumasaqaatigineqartunik naammassinninersut inissaqartitsineq naapertorlugulu tiguineqassanersut, taamaattoq takuuk imm. 3.

*Imm. 5.* Rektorip imaluunniit ilinniarfimmi akuerisaasumi pisortap tamatumunnga peqatigitillugu aalajangiiffigissavaa qinnuteqartunit sorliit utaqqisunut allattorsimaffimmi salliutillugit allatsissanersut. Qinnuteqartut utaqqisunut allattorsimaffimmi salliutinneqarlutik allatsissimasut salliutinneqarnertik naapertorlugu ilinnialernissamut neqeroorfigineqarsinnaapput, ilinnialersussatut akuerisaasut taamaatiinnarnissartik kissaatigisimappassuk imaluunniit ilinniarnernerup aallartinnerani aallartissimangippata.

**§ 13.** Illassutitut ilinniagaqarnissamik akuerisaanissamut piumasaqaataapput:

- 1) qinnuteqartut ilinniarnertuutut imaluunniit tassunnga assingusumik ilinniagaqarnerminnik naammassinnissimasut aalajangersimasumik ingerlaqqiffusumik ilinniarfigerusutaminnut qinnuteqarnissamut ilinniartitsissummik ataatsimik arlalinnilluunniit imaluunniit qaffasissutsimik amigaateqartut,
- 2) qinnuteqartut aalajangersimasumik ingerlaqqiffusumik ilinniarfigerusutaminnut qinnuteqarnissamut piumasaqaatinik naammassinninnissamut ilinniartitsissummik naammassineqareersumik karakteriminnik pitsanngorsaaniartut.

*Imm. 2.* Illassutitut ilinniagaqarnissamut qinnuteqartut ukiuni pingasuni ilinniarnertuunngorniartutik qinnuteqartut inissaannik tiguisinnaangillat.

*Imm. 3.* Rektorip imaluunniit ilinniarfimmi akuerisaasumi pisortap qinnuteqartut kajumissuseqarlutik qinnuteqaataannik ilinniakkatigullu piginnaasaannik, taakkununnga ilanngullugit qinnuteqartut ilinniarnissamut qaffasissusaannik imaluunniit ilinniartitsissummi assingusumi ilinniartitsissutiniluunniit ilinniarusutaannik kiisalu siusinnerusukkut ilinniagarisimasaannik inuussutissarsiutigisimasaannillu aamma nunap immikkoortuini sumi ilinniagaqarusunnerannik ataatsimut nalilersuineq tunngavigalugu aalajangissavaat qinnuteqartut sorliit imm. 1-imi piumasaqaatigineqartunik naammassinninersut inissaqartitsineq naapertorlugu tiguneqassanersut, taamaattoq takuuk imm. 2.

*Imm. 4.* Rektorip imaluunniit ilinniarfimmi akuerisaasumi pisortap aalajangiiffigissavaat qinnuteqartunit sorliit utaqqisunut allattorsimaffimmi salliutillugit allatsissanersut. Qinnuteqartut utaqqisunut allattorsimaffimmi salliutinneqarlutik allatsissimasut salliutinneqarnertik naapertorlugu ilinnialernissamut neqeroorfigineqarsinnaapput, ilinnialersussatut akuerisaasut taamaatiinnarnissartik kissaatigisimappassuk imaluunniit ilinniarnernerup aallartinnerani aallartissimangippata.

**§ 14.** Ilinniartitsissutinik ataasiakkaanik ilassutitullu ilinniagassanik pikkorissartut ilinniagaqalernissamik qinnuteqarnerminnut atatillugu aamma ilinniarnernerup nalaani nalunaarutigissavaat qinnuteqartut ilinniartitsissutinik ataasiakkaanik ilinniagaqarusunnerlutik imaluunniit illassutitut ilinniagaqarusunnerlutik.

#### *Qinnuteqarnermi periutsit*

**§ 15.** Ilinniartitsissutinik ataasiakkaanik ilinniagaqarnissamut aamma illassutitut ilinniagaqarnissamut qinnuteqarnermi immersugassaq Ilinniartitaanermut Naalackersuisoqarfimmit akuerisaasoq atorlugu qinnuteqartoqassaaq.

*Imm. 2.* Ilinniartitaanermut Naalackersuisoqarfup akuersissuteqarneratigut nalinginnaasumik qinnuteqarnissamut piffissarititap avataatigut ilinniartussanik tigusinissamut akuersissuteqartoqarpat

ilinniarnertuunngorniarnissamut imaluunniit ilinniarnissamut akuerisaasoq namminneerlutik qinnuteqarnermi immersugassamik suliaqassapput.

*Imm. 3.* Illassutitut ilinniagaqarnissamut qinnuteqartut ilanngutissavaat appasinnerulaartumik ilinniagarisimasaminni angusaminnut uppersaasaat siunissami ilinniagarerusutaminnut piunasaqaatitut uppersaasaat aamma kajumissuseqarlutik qinnuteqaatertik siunissami ilinniagarerusutamik nassuiaatitalik.

*Imm. 4.* Qinnuteqarnissamut piffissarititap ilinniarnertuunngorniarnissamut pillugu Namminersorlutik Oqartussat nalunaarutaanni § 3 naapertorlugu ukiuni pingasuni ilinniarnertuunngorniarnissamut nalinginnaasumik qinnuteqarnissamut piffissarititaq malissavaa. Ilinniarnertuunngorniarnissamut imaluunniit ilinniarnissamut akuerisaasoq kingusinnerusukkut qinnuteqarnissamut piffissamik aalajangersaasinnaapput ilinniartitsissutit ataasiakkaat ilassutitullu ilinniarnissamut ukiuni pingasuni ilinniarnertuunngorniarnissamut qinnuteqarfissatut periarfissarititaasumit kingusinnerusukkut neqeroorutigineqarpata. Tamanna aamma immikkut ittumik eqikkakkamik ilinniagaqarnissamut atuuppoq.

**§ 16.** Qinnuteqartup kommunitut najugarivisamini ilinniarnertuunngorniarnissamut imaluunniit ilinniarnissamut akuerisaasoq salliuatillugit ilinnialerfissatut qinnutigissavaa ilinniarnertuunngorniarnissamut imaluunniit ilinniarnissamut akuerisaasup ilinniartitsissutit imaluunniit ilinniartitsissutit neqeroorutigippagit.

*Imm. 2.* Qinnuteqartup imm. 1 malillugu ilinniarnertuunngorniarnissamut pillugu Namminersorlutik Oqartussat nalunaarutaanni § 3 naapertorlugu ukiuni pingasuni ilinniarnertuunngorniarnissamut nalinginnaasumik qinnuteqarnissamut piffissarititaq malissavaa. Ilinniarnertuunngorniarnissamut imaluunniit ilinniarnissamut akuerisaasoq kingusinnerusukkut qinnuteqarnissamut piffissamik aalajangersaasinnaapput ilinniartitsissutit ataasiakkaat ilassutitullu ilinniarnissamut ukiuni pingasuni ilinniarnertuunngorniarnissamut qinnuteqarfissatut periarfissarititaasumit kingusinnerusukkut neqeroorutigineqarpata. Tamanna aamma immikkut ittumik eqikkakkamik ilinniagaqarnissamut atuuppoq.

*Imm. 3.* Qinnuteqaat qinnuteqartumit atsiorneqassaaq. Qinnuteqartoq angajoqqaatut oqartussaassusilinnit oqartussaaffigineqarpata qinnuteqaat aamma angajoqqaatut oqartussaassusilinnit atsiorneqassaaq.

**§ 17.** Ilinniagaqarnissamut qinnuteqaat qinnuteqartup kommunitut najugarivisaani iffissanut, ilitsersuisarnernut pikkorissaqqinnernullu qitiusumik ingerlatsivimmum nassiunneqassaaq, ilinniarnertuunngorniarnissamut imaluunniit ilinniarnissamut akuerisaasoq nalinginnaasumik qinnuteqarnissamut piffissarititap avataatigut allamik qinnuteqarnissamut piffissaliisimangippata, allamik piffissaliisimagunik namminneerlutik qinnuteqarnermi immersugassamik suliaqassapput. Pisuni taakkunanani ilinniagaqarnissamut qinnuteqaat ilinniarnertuunngorniarnissamut imaluunniit ilinniarnissamut akuerisaasumut ilinniartitsissutit ataasiakkaat ilassutitulluunniit ilinniagaqarnissamik neqerooruteqartunut toqqaannartumik nassiunneqassaaq.

*Imm. 2.* Qinnuteqartut qinnuteqarnermi nalaanni Kalaallit Nunaata avataani aalajangersimasumik najugaqartut akuerisaanissaannut atatillugu kommuni ilaqutariittut attuumassuteqarfiginerusaq angerlarsimaffittut naatsorsuunneqassaaq. Ilaqutariittut attuumassuteqarfigisaq nalinginnaasumik tassaassaaq, qinnuteqartup kingullermik Kalaallit Nunaanniinnermini illoqarfik najugarisimasaa.

**§ 18.** Ukiuni pingasuni ilinniarnertuunngorniarnissamut qinnuteqaammik nassiussinissamut piffissarititatu aalajangersarneqartoq ilutigalugu qinnuteqartup kommunitut najugarivisaani suliffissanut,

ilitersuisarnernut pikkorissaqqinnernullu qitiusumik ingerlatsiviup qinnuteqaat ilinniarnertuunngorniarfimmi rektorimut imaluunniit ilinniarfimmi akuerisaasumi pisortamut qinnuteqartup salliutillugu ilinniarfigerusutaaniittumut nassiutissavaa.

*Imm. 2.* Kingusinnerpaamik ullormi nassiussiviusumi paasissutissat qinnuteqaammiittut tamaasa suliffissanut, ilitersuisarnernut pikkorissaqqinnernullu qitiusumik ingerlatsiviup elektroniskiusumik database-mut IT-reg-imut immiutissavai.

**§ 19.** Ilinniartitsissutit ataasiakkaat imaluunniit ilassutitut ilinniagassat kommunimi qinnuteqarnerup nalaani qinnuteqartup najugarisaaniittumi ilinniarnertuunngorniarfimmi imaluunniit ilinniarfimmi akuerisaasumi pilersinneqarpata qinnuteqartoq ilinniarnertuunngorniarfimmi imaluunniit ilinniarfimmi akuerisaasumi tiguneqassaaq, taamaattoq tak. imm. 3.

*Imm. 2.* Ilinniartitsissutit ataasiakkaat imaluunniit ilassutitut ilinniagassat qinnuteqartup kommunut najugarivisaani pilersinneqarsimangippata ilinniarnertuunngorniarfimmi imaluunniit ilinniarfimmi akuerisaasumi qinnuteqartup salliutinnerpaallugu ilinniarfigerusutaani aamma ilinniartitsissutinik ataasiakkaanik imaluunniit ilassutitut ilinniagassanik pilersitsiffusimasumi qinnuteqartoq tiguneqassaaq.

*Imm. 3.* Qinnuteqartoq ilinniakkatigut piginnaasani inuttullu tunngavigisani pissutigalugit kommunut najugarivisap avataani ilinniarnertuunngorniarfimmi imaluunniit ilinniarfimmi akuerisaasumi ilinniagaqalerusuppat, kommunut najugarivisami ilinniarnertuunngorniarfik imaluunniit ilinniarfik akuerisaasoq ilinniartitsissutinik ataasiakkaanik ilassutitulluunniit ilinniagassanik neqerooruteqaraluarpuunniit, qinnuteqartoq ilinniarnertuunngorniarfimmi imaluunniit ilinniarfimmi akuerisaasumi inissaqarpataq tiguneqarsinnaavoq, aamma rektori imaluunniit ilinniarfimmi pisortaq isumaqarpata qinnuteqartup ilinniarnertuunngorniarfimmi imaluunniit ilinniarfimmi akuerisaasumi ilinniagaqalerusulluni tunngavilersuutai pingaaruteqartut.

**§ 20.** Qinnuteqartup salliutillugu ilinniarfigerusutaani ilinniarnertuunngorniarfimmi rektorip imaluunniit ilinniarfimmi akuerisaasumi pisortap ukiuni pingasuni ilinniarnertuunngorniarnermi qinnuteqarnissamut piffissarititaasup naannginnerani qinnuteqartoq nalunaarfigissavaa tiguneqarsimanersoq, tassunga ilanngullugu ilinniarnertuunngorniararneq pillugu Namminersorlutik Oqartussat nalunaarutaanni § 9 naapertorlugu tiguneqarneq piumasaqaatitaqarnersoq imaluunniit ilinniarnertuunngorniararneq pillugu Namminersorlutik Oqartussat nalunaarutaanni § 10 naapertorlugu naammattunik inissaqarnissaa apeqqutaatillugu nalunaaruteqartoqarnersoq.

*Imm. 2.* Qinnuteqartup tiguneqarsimasutut nalunaarfigineqarnera ilutigalugu ilinniarnertuunngorniarfimmi imaluunniit ilinniarfimmi akuerisaasumi sorlermi qinnuteqartoq tiguneqarsimanersoq pillugu nalunaarfigineqassaaq, qinnuteqartoq ilinniartitsissutinik ataasiakkaanik imaluunniit ilassutitut ilinniagassanik ilinniagaqarnissamut qinnuteqarsimappat, ukunani pilersinneqarsimasunik:

- 1) kommunut najugarivisami ilinniarnertuunngorniarfimmi imaluunniit ilinniarfimmi akuerisaasumi, imaluunniit
- 2) kommunut najugarivisap avataani ilinniarnertuunngorniarfimmi imaluunniit ilinniarfimmi akuerisaasumi qinnuteqartup salliutinnerpaallugu ilinniarfigerusutaani aamma ilinniartitsissutinik ataasiakkaanik imaluunniit ilassutitut ilinniagassanik pilersitsiffusimangitsuni.

*Imm. 3.* Qinnuteqartoq inissaqarniarnikkut pissutsit tunngavigalugit tiguneqartutut

nalunaarfigineqarsinnaasimangitsoq rektorimit imaluunniit ilinniarfimmi akuerisaasumi pisortamit nalunaarfigineqassaaq utaqqisuni salliutitassanut ilanngunneqartoq.

**§ 21.** Qinnuteqartut piumasaqaatitalimmik tiguneqarsimasutut nalunaarfigineqartut tiguneqavittutulli nalunaarfigineqarsinnaangitsut, piumasaqaatitalimmik tiguneqarsimanerat pillugu nalunaarfigitinnerat ilutigalugu ilisimatinneqassapput inissat naammattut apeqqutaatillugit tiguneqartut, kiisalu ilinniartitsissutinit ataasiakkaanit ilassutitullu pikkorissarfissanit appasinnerulaartunik ilinniagaqarsimanerat naammassinnissimanerallu apeqqutaatillugit tiguneqartut aamma kingusinnerusukkut nalunaarfigineqassasut ilinniarnertuunngorniarfimmi imaluunniit ilinniarfimmi akuerisaasumi sorlermi tiguneqavissinnaanersut.

**§ 22.** Qinnuteqartup salliutillugu ilinniarfigerusutaani ilinniarnertuunngorniarfimmi rektorip imaluunniit ilinniarfimmi akuerisaasumi pisortap qinnuteqartut piumasaqaatitalimmik tiguneqarsimanerannik imaluunniit inissat naammattut apeqqutaatillugit tiguneqarsimanerannik siusinnerusukkut nalunaarfigineqarsimasut ilinniartussatut tiguneqavissimanersut kingusinnerpaamik 1. juli inaarutaasumik nalunaarfigissavai.

*Imm. 2.* Qinnuteqartut naammattunik inissaqarnissaq apeqqutaatillugu tiguneqarnissamik siusinnerusukkut nalunaarfigineqarsimasut inaarutaasumillu tiguneqanngitsut nalunaarfigineqassapput utaqqisuni salliutitassanut ilanngunneqartut.

*Imm. 3.* Qinnuteqartut utaqqisuni salliutitassanut ilanngunneqartut salliutitsinerit naapertorlugit tiguneqartussatut kingusinnerusukkut neqeroorfigineqassapput, ilinniartussatut tiguneqartuni ilinniartunngortinneqarnissamik kissaateqarnermik taamaatitsiinnartoqarpat imaluunniit ilinniarnerep aallartinnerani aallartissimangippata, tak. Ilinniarnertuunngorniartarneq pillugu Namminersorlutik Oqartussat nalunaarutaanni § 14.

**§ 23.** Tiguneqavissut tiguneqarnerminnik nalunaarfigineqarnerat ilutigalugu ilinniarnertuunngorniarfimmi imaluunniit ilinniarfimmi akuerisaasumi sorlermi tiguneqarnersut pillugit ilisimatinneqassapput.

**§ 24.** Qinnuteqartoq tiguneqarnerminik ilisimatinneqarsimasoq ilinniarnerep aallartinnerani ilinniartitsissutininik ataasiakkaanik imaluunniit ilassutitut ilinniagassanik ilinniarluni aallartissaaq, taamaattoq tak. imm. 3.

*Imm. 2.* Qinnuteqartoq tiguneqarnissamut nutaamik qinnuteqaqqissaaq qinnuteqarfiup nalaani ilinniartitsissutininik ataasiakkaanik imaluunniit ilassutitut ilinniagassanik ilinniarluni aallartitserusunngikkuni.

*Imm. 3.* Pissutsit immikkut ittut tunngavissaqartitsippata ilinniarnerep aallartinnerata kinguinngua ilinniartitsissutininik ataasiakkaanik imaluunniit ilassutitut ilinniagassanik ilinniarnerep aallartinneqarnissaa rektorip imaluunniit ilinniarfimmi akuerisaasumi pisortap akuersissutigisinnaavaa.

## **Kapitali 4**

### *Aaqqissuussaanera imarisaalu*

**§ 25.** Ilinniartitsissutininik ataasiakkaanik ilassutitullu ilinniagassanik ilinniarneq nalinginnaasumik aallartissaaq ukiup ilinniartitsiviusup aallartinnerani naammassissallunilu ukiup ilinniartitsiviusup naanerani, taamaattoq tak. imm. 2.

*Imm. 2.* Ilinniartitaanermut Naalakkersuisoqarfup pissutsit immikkut ittut tunngavissaqartitsippata ilinniarnertuunngorniarfimmit imaluunniit ilinniarfimmit akuerisaasumit qinnuteqartoqarneratigit ilinniartitsissutit ataasiakkaat ilassutitullu ilinniagassat ilinniarnep aallartinnerani ilinniartitsissutigineqannginnissaat aalajangersinnaavaa.

**§ 26.** Ilinniartitsissutit ataasiakkaat ilassutitullu ilinniagassat ilinniartitsissutigineqarnissaannut apeqqutaapput ilinniartitsissutit pineqartut tiimini qassini ilinniartitsissutigineqarsinnaanerat kiisalu ilinniarnertuunngorniarfiup imaluunniit ilinniarfiup akuerisaasup taakkunannga qanoq neqerooruteqarnerat aqqissuussaqaarnerallu.

**§ 27.** Ilikkagassatut pilersaarutit pillugit malittarisassat Ilinniarnertuunngorniarfimmi ilikkagassatut pilersaarutit pillugit Namminersorlutik Oqartussat nalunaarutaanni §§ 1-7-ni, § 8, imm. 1-imi, § 11, imm. 2-mi, §§ 14-16-ini, §§ 18-25-ni, § 27, § 28, imm. 1-imi aamma §§ 29-31-ni malittarisassat malippaat.

**§ 28.** Ilinniartitsissutininik ataasiakkaani ilassutitullu ilinniagassanik ilinniartitsineq internetikkut ilinniartitsissutissatut ilinniartumut neqeroorutigineqarsinnaavoq.

*Imm. 2.* Ilinniartitsissutit ilinniarnertuunngorniarfimmi imaluunniit ilinniarfimmi akuerisaasumi ilinniartup § 19 malillugu ilinniarfigerusullugu qinnuteqarfigisimasaani neqeroorutigineqanngippat imaluunniit ilinniartup ilinniartitsinermik malinnaaniarluni illoqarfimmut allammut nuunnissaa ajornarpat imaluunniit siunertamut naapertuutinngippat ilinniartup naammagisariaqarpaa ilinniartitsinerup internetikkut ilinniartitsissutit neqeroorutigineqarnera. Ilinniartulli piumasarisinnaavaa ilinniartitsissutit ataasiakkaat imaluunniit ilassutit ilinniagassat internetikkut ilinniartitsissutit neqeroorutigineqarnissaat.

**§ 29.** Ilinniartitsissutininik ataasiakkaanik ilassutitullu ilinniagassanik pikkorissartut ukiuni pingasuni ilinniarnertuunngorniarfimmi klassinut pilersinneqareersimasunut ilanngunneqartut suleqatigiiaanik ilinniartitsisoqartitsinermik aqqissuussamut klassini pineqartuni atuutereersumut ilaatinneqassapput.

*Imm. 2.* Ilinniartitsissutininik ataasiakkaanik ilassutitullu ilinniagassanik pikkorissartunut tunngatillugu rektorip imaluunniit ilinniarfimmi akuerisaasumi pisortap ilinniartitsisoqatigiit ilinniartitsisunik arlalinnik ilinniartitsinermi isumaginnittussanik inuttaqartut katitissavai.

*Imm. 3.* Ilinniartitsisoqatigeearneq pillugu malittarisassat allat Ilinniarnertuunngorniararneq pillugu Inatsisartut inatsisaanni § 38, imm. 2-5-ini malittarisassanik malinnissapput.

**§ 30.** Ilinniarnertuunngorniarfik imaluunniit ilinniarfik akuerisaasooq ilinniartunut ataasiakkaanut tapersersuisassaaq, siunnersuisassalluni aamma ilinniartitsissutit ataasiakkaat imaluunniit ilassutitut pikkorissarnissat kiisalu ilinniagassatut inuussutissarsiuutissatullu toqqakkat naammassineqarnissaannut ilitsersuisassalluni. Suliasat tamakkiisumik ilaannakortumilluunniit piffissap ilinniartitsiffiup skemaqartup avataani isumagineqarsinnaapput.

*Imm. 2.* Rektorip imaluunniit ilinniarfimmi akuerisaasumi pisortap qulakkiissavaa ilinniarfimmi akuerisaasumi ilinniartitsissutininik ataasiakkaanik imaluunniit ilassutit ilinniagassanik ilinniarnermi

suliassat periutsillu pillugit ilitsersuisoqarnissaa. Aamma rektori imaluunniit pisortaq ilitsersuinerup aaqqissugaanissaa pilersaaruserneqarnissaalu pillugit aalajangiissaaq.

*Imm. 3.* Ilinniartoq siunnersuinerumut ilitsersuinerumullu, imm. 1 naapertorlugu ingerlanneqartumut peqataasussaataavoq.

**§ 31.** Angusimasanik ilinniarnermut allamut nuussisarnermi malittarisassat Ilinniarnertuunngorniarfimmi angusimasanik ilinniarnermut allamut nuussisarneq allatullu atuartsinerumut peqataannginnissaq pillugu Namminersorlutik Oqartussat nalunaarutaanni §§ 1-3-ni, § 13-imi aamma § 19-imi malittarisassat malissavaat.

**§ 32.** Angusimasanik ilinniarnermut allamut nuussineq taamaallaat ilaannakortumik nuussinertut atuutsinneqarsinnaavoq.

**§ 33.** Ilaannakortumik angusimasanik ilinniarnermut allamut nuussinerup kingunerisinnaavaa ilinniartup taamaallaat ilinniartitsissummik imaluunniit ilinniartitsissutinik misilitsinnera.

## **Kapitali 5**

### *Ilinniarnermi ileqqorissaarnissamullu malittarisassat*

**§ 34.** Ilinniarnermi ileqqorissaarnissamullu malittarisassat Ilinniarnertuunngorniarfinni ilinniarnermut ileqqorissaarnermullu malittarisassat pillugit Namminersorlutik Oqartussat nalunaarutaanni §§ 1-8-ni, §§ 10-11-ni malittarisassat malippaat.

**§ 35.** Ilinniartumut ilinniarnertuunngorniarfiup imaluunniit ilinniarfiup akuerisaasup ilinniarnermut ileqqorissaarnissamullu malittarisassaanik malinninngitsumut perorsaanikkut avoqqaarineq rektorimit imaluunniit ilinniarfiup akuerisaasup pisortaanit naammanngitsutut isigineqarpat iliuuserisassat makku atorineqarsinnaapput:

- 1) Mianersoqqussut.
- 2) Aaqqissuussani ingerlataniluunniit aalajangersimasuni peqataaqqusinnginneq.
- 3) Ukiup ilinniarfusup ingerlanerani piffissani sivikinnerusuni atuartsinermi peqataanngikkallartitsineq.
- 4) Nammineq ilinnialersussatut innersuussineq.
- 5) Ilinniarfimmiit peersitaaneq (anisitaaneq).

*Imm. 2.* Imm. 1, nr. 4-5 naapertorlugit aalajangiinerit misilitsinnerit ingerlanneqarnissaannut ukiumoortumik pilersaarutip tamanut saqqummiunneqarnissaani kingusinnerpaamik qaammat ataaseq sioqqullugu aalajangerneqartassapput.

*Imm. 3.* Iliuserisaaq ilinniarnertuunngorniarfiup imaluunniit ilinniarfiup akuerisaasup ilinniarnermi ileqqorissaarnissamullu malittarisassaanik unioqqutinneqartumut naleqquttuusaaq.

## **Kapitali 6**

### *Naliliisarneq nalilersuisarnerlu*

### *Naliliisarneq*

§ 36. Nalilersuinermi Greenlandic Grading System skala atorlugu karakteriliisoqartassaaq.

§ 37. Misilitseriaaseq apeqqutaatinnagu ilinniartut ataasiakkaarlutik naliliiffigineqassapput.

§ 38. Suliassat annertuut tamarmik immikkullu suliat pikkorissartunit pilersaarusoqataaffigineqartut immikkut nalilersuiffigineqartassapput.

#### *Ingerlaavartumik naliliineq*

§ 39. Ilinniarnep sivilissusaa apeqqutaatinnagu ilinniartup ilinniartinneqarnermini pissarsiai pillugit ingerlaavartumik nalilersuisoqartassaaq.

*Imm. 2.* Naliliinermi ilinniartup nammineq imminut nalilenera ilaatinneqassaaq.

§ 40. Naliliinerup imarissavai ilinniartup angusanut tunngatillugu karakterii, ilinniarfiup iluani misilitsinnermi karakterii aamma oqaasiinnakkut allakkatigullu oqaaseqaatit kiisalu ilinniartup ilinniartinneqarnermini pissarsiai allat.

§ 41. Angusanut tunngatillugu karakterit tassaapput, ilinniartitsissummi pineqartumi ilinniakkatigut ilisimasassani anguniakkanik, ilikkagassatut pilersaarummi paasinninnermut periutsinullu tunngatillugu ilinniartut ataasiakkaat karakteriliinerup nalaani qanoq piviusunngortitsitiginerannik oqariartuutit.

§ 42. Ilinniarfiup iluani misilitsinnermi karakterip oqariartuutigaa ilinniartut ataasiakkaat suliakkiissummut naleqqiullugu ilinniakkatigut ilisimasassani anguniakkanik, paasinninnermut periutsinullu tunngatillugu qanoq piviusunngortitsitiginerat.

§ 43. Oqaasiinnakkut allakkatigullu oqaaseqaatit oqariartuutigaat ilinniartut ataasiakkaat suliakkiissummut naleqqiullugu ilinniakkamilu pineqartumi ilinniakkatigut ilisimasassani anguniakkanik, paasinninnermut periutsinullu tunngatillugu qanoq piviusunngortitsitiginerat. Tassunga ilaassaaq ilinniartup angusaanut tunuliaqutaasut pillugit nassuiaat, aammalu ilinniartup ilinniartitsissummi pineqartumi qanoq sulinerminik ingerlatseqqissinnaanera pillugu nassuiaammik ilaqarsinnaalluni.

§ 44. Ingerlaavartumik naliliisarnep ilinniartoq nammineq siumukassusianik paasissutississavaa, tassuunakkut ilinniartup ilikkariartoqqinnera ineriartorneralu pillugit ilitsersuinissamut pilersarusiornissamullu tunngavissiiisoqaqqullugu. Tamatuma saniatigut naliliinerup isumannaassavaa, 1) ilinniagaqartup ilinniartitsissutit qaffasissusaasigut qanoq inissisimanini ilisimassagaa, nammineq ilinniarnerninik ingerlatsinissaminut ineriartornissaminullu tunuliaqutassatut, 2) ilinniagaqartup misilitsinnissamut namminerlu ineriartornerminik ilikkakkatigullu nalilersuisarnissaminut sungiusarneqarnissaa, 3) ilinniartitsisup aamma ilinniarnertuunngorniarfiup imaluunniit ilinniarfiup akuerisaasup ilinniartinneqarnermini pissarsiaasa ineriartornerat ataatsimut isigalugu malinnaaffigissagai, 4) ilinniartitsisup aamma ilinniarnertuunngorniarfiup imaluunniit ilinniarfiup akuerisaasup ataatsimut

isigalugu ilinniartitsinermi ilinniartup pissarsiaanik tassunga ilanngullugu ilinniartup ilinniarnermik naliliineranik ilisimatinneqarnissaat,

5) ilinniartitsisup aamma ilinniarnertuunngorniarfiup imaluunniit ilinniartup akuerisaasup ilinniakkat sammivissaannik toqqaanissaq, ilinniartitsissutinik qinigaqarnissaq ilinniartitsissutillu qaffasissusaat eqqarsaatigalugit ilinniagaqartup ilinniarnermi ingerlaqqinnissaa ineriartoqqinnissaalu ataatsimut isigalugit siunnersuinissaminut pilersarusiornissaminullu tunngavissinneqarnissaa, aamma

6) ilinniarnertuunngorniarfiup imaluunniit ilinniartup akuerisaasup ilinniartup ilinniarnermi pissarsiarisai pillugit angajoqqaatut oqartussaassuseqartunut ilisimatitsissuteqarnissamut tunngavissinneqarnissaa.

#### *Naliliisarnerup aaqissuunneqarnera*

**§ 45.** Rektorip imaluunniit ilinniartup akuerisaasumi pisortap qulakkiissavaa holdit atuatigillu tamarmik naliliiffineqarnissaannut pilersarusiortoqartarnissaa makkunannga imalimmik:

1) Holdit atuatigillu ilinniartup iluani misilitsittarnerannut takussutissiaq.

2) Ilinniarnertup ingerlanerani qaqugukkut angusanut tunngatillugu karakteriliisoqartarneranut takussutissiaq.

3) Ilinniartup ingerlaavartumik aaqissuussamillu qanoq angusaqarsimaneq pillugu ilinniartitsissutini tamani ilisimatitsissuteqartarnissamut pilersaarut, tamatumunnga ilanngullugu oqaaseqaateqarnerni.

4) Nalilersuisarnerit ilinniartunik siunnersuinermi atornerqarnissaannut pilersaarutit.

5) Ilinniartup tamarmik nalilersuiffineqarneranni angusat pillugit angajoqqaatut oqartussaassuseqartut ilisimatinneqarnissaannut pilersaarut.

**§ 46.** Ilinniartitsissutinik ataasiakkaanik illassutitullu ilinniagassanik ilinniarnermi semesterimut ataatsimut minnerpaamik ataasiarluni angusanut tunngatillugu karakteriliisoqartassaaq aamma ilinniartitsissutit ataasiakkaat ilinniarneqarneri imaluunniit illassutit ilinniarnertup semesterinit marluusunit sivikinneruppata minnerpaamik marloriarluni angusanut tunngatillugu karakteriliisoqartassaaq.

**§ 47.** Ilinniarnertuunngorniarfik imaluunniit ilinniartup akuerisaasooq ukiut atuarfusut naaneri tamaasa ilinniartup ilinniartup iluani misilitsinnermi karakterii aamma inaarutaasumik angusat pillugit karakterii pillugit uppersaasiortassaaq. Uppersaasat ilinniartumit pissarsiariuminartuussaaq aamma atortut elektroniskiusut atorlugit pissarsiariuminartuussalluni.

*Imm. 2.* Ukiuni atuarfusumi angusat pillugit karakterit tamarmik akunnaallisarneqanngitsut agguaqatigiissinnerat ilinniartitsissutit ataasiakkaat imaluunniit illassutit ilinniarnertup ukiuni arlalinni sivissuseqassappata ilinniartup ingerlaqqinnissamut tunngavigisaanut ilaatinneqassapput.

#### *Angajoqqaatut oqartussaassuseqartut ilisimatinneqartarnerat*

**§ 48.** Ilinniartup ilinniarnermi pissarsiaanut tunngatillugu ilinniarnertuunngorniarfiup imaluunniit ilinniartup akuerisaasup qanoq isiginninnera pillugu angajoqqaatut oqartussaassuseqartut akulikitsumik ilisimatinneqartassapput.

*Imm. 2.* Ilisimatitsisoqartassaaq angusat pillugit karakteriliinerni tamani.

*Imm. 3.* Ilisimatitsineq ilinniartup angusanut tunngatillugu karakterii aammalu misilitsinnerni karakterii, kiisalu ilinniartup atuarnerni tamakkiisumik pissarsiai pillugit oqaloqateqarnissamut neqerooruteqarnikkut pisassaaq.

**§ 49.** Ilinniartunut angajoqqaatut oqartussaassuseqartunit oqartussaaffigineqanngitsunut angerlarsimaffimmut ilisimatitsineq ilinniartup akuersereerneratigut aatsaat ingerlanneqarsinnaavoq.

#### *Ingerlaqqinneq*

**§ 50.** Ilinniartitsissutit ataasiakkaat ilassutitulluunniit ilinniarnertit ukiuni arlalinni sivissuseqassappata ukiumut atuarfusussamut tullermut taamaallaat ingerlaqqittoqarsinnaavoq ilinniartuq ilinniarnerni naammaginnartumik aatsaat pissarsisimappat.

*Imm. 2.* Ukiup atuarfusup naanerani rektorip imaluunniit ilinniarfimmi akuerisaasumi pisortap nalilersussavai ilinniartup angusarissimasai aamma ilinniarnerni pissarsiarissimasai.

*Imm. 3.* Ilinniartuq ingerlaqqinnissamut pisinnaatitaaffeqarpoq ilinniartup ukiup atuarfusup naanerani angusaqarnissamik piumasaqaatit naammassisimagunigit, tak. Ilinniarnertuunngorniarluni ilinniakkami naliliisarneq aamma uppersaasiisarneq pillugit Namminersorlutik Oqartussat nalunaarutaanni § 95, imm. 4.

**§ 51.** Rektorilli imaluunniit ilinniarfimmi akuerisaasumi pisortap § 50, imm. 3 naapertorlugu ilinniartup ukiup atuarfusup tullianut ingerlaqqissinnaanera itigartitsissutigisinnavaa ilinniartuq maannamut ilinniarnerni pissarsiarissimasaminik naammaginnartumik angusaqarsimangippat. Rektorip imaluunniit ilinniarfimmi akuerisaasumi pisortap tassunga ilanngullugu nalilissavaa ilinniartup ilinniarni naammassisinnaaneraa, tassunga ilanngullugu perorsaaniikkut immikkut ikiorsiissutaasunik aqqissuussisoqarneratigut, tamatumunnga ilanngullugu immikkut aqqissuussamik siunnersuinikkut iliuuseqarnerit aqqutigalugit ilinniartup ilinniarni naammassisinnaaneraa.

**§ 52.** Ilinniartuq ingerlaqqinnissamut itigartitaappat ilinniartuq ilinniarnernit anisinneqassaaq.

*Imm. 2.* Ilinniarnertuunngorniarfik imaluunniit ilinniarfik akuerisaasoq ilinniartumik anisitsinnermi ilinniartumut taassumalu angajoqqaatut oqartussaaffigisaanut ilinniarnerni ingerlaqqinnissamut periarfissat allat pillugit, tassunga ilanngullugu ilinniartitsissummut allamut imaluunniit ilinniarnerni allamut nuussinaneq pillugu ilitsersuussissaaq.

#### *Inaarutaasumik naliliineq*

**§ 53.** Inaarutaasumik naliliineq ilinniartitsissummik ataatsimik arlalinnilluunniit soraarummeernikkut pissaaq.

**§ 54.** Ilinniarnertuutut soraarummeertoqarsinnaavoq ilinniartitsissutini ataasiakkaani ilinniartitsissutini pinngitsoorani peqataaffigisassani misilitsinnermi, ilinniartitsissutini toqqagassani pisariaqartunik

amerlassusilinni aamma ilinniartut ataasiakkaarlutik ilinniarnermi suliaanni karakterinik katiterinikkut.

**§ 55.** Ilinniartitsissutini ataasiakkaani aamma ilassutitut ilinniarnermi soraarummeerutigineqarsinnaapput ilinniarnertuunngorniarnermi ilinniartitsissutit tamarmik, taamaallaat ilinniartitsissutit timersorneq, nipilersorneq aamma assilissanik eqqumiitsuliorneq killiffik C-miittoq pinnagit kiisalu ilinniartitsissutit science ilinniarnermilu periutsit pinnagit.

**§ 56.** Misilitsinnerit § 54-imi pineqartut imminnut ilinniartittunit ingerlanneqassapput, tak. 6, imm. 1.

*Imm. 2.* Imminnut ilinniartittut laboratoriami misileraanermik misilitsikkusuttut ilinniartitsissummi sungiusaatinik sammisamut tunngassuteqartunik naammassinnissimanerminnut uppersaasat tunniutissavaat imaluunniit imminnut ilinniartittut laboratoriami pikkorissarsimassapput.

*Imm. 3.* Ilinniarnertuunngorniarnarfiit imaluunniit ilinniarnarfiit akuerisaasut ataasiakkaat immikkut ittumik pissuteqartoqartillugu laboratoriami pikkorissaasinaapput. Taamaattoqassappat minnerpaamik ukiumut ataasiarluni laboratoriami pikkorissaasoqartassaaq. Laboratoriami pikkorissaanerup imarissavai ilinniartitsissutini misilitsinnissamut piunasaqaataasuni sungiusaatinik sammisamut tunngassuteqartunik sungiusarnissamut pisariaqartut.

*Imm. 4.* Ilinniarnertuunngorniarnarfinni ataasiakkaani rektori imaluunniit ilinniarnarfiit akuerisaasumi pisortaq tigussaasumik nalilersuereernerme aalajangiissapput laboratoriami pikkorissaasoqassanersoq.

**§ 57.** Inaarutaasumik nalilersuinerme siunertaavoq angusat karakterilerneqarnerisigut pikkorissartup ilinniakkani pikkorissarfusuni ilikkagassatut siunniussanik qanoq pissarsiaqartigisimaneramik uppersaanissaq.

*Imm. 2.* Inaarutaasumik nalilersuineq tunngaviuvoq ilinniartitsissutinik ataasiakkaanik imaluunniit ilassutitut ilinniagassanik ilinniagaqarsimanermut uppersaasammik tunniussinissamut imaluunniit ilinniartitsissutit ataasiakkaat ilassutitulluunniit ilinniarnarfiit ilinniartitsissutitut ataatsimoortut ilinniarneqarsimanerannut uppersaasammik tunniussinissamut.

#### *Naliliisarnarup aaqqissuunneqarnera*

**§ 58.** Soraarummeerneq piffissami immikkut soraarummeernissamut immikkoortitami ingerlanneqartassaaq, ukiut atuarfusut ataasiakkaat naammassinerannut atatillugu.

*Imm. 2.* Kulturilerineq pillugu ilinniartitsissummi C-mi soraarummeerneq decembarip qaammataani ingerlanneqarsinnaavoq. Soraarummeernerit nalinginnaasut allat maajimi juunimilu ingerlanneqartassapput (Aasaanerani soraarummeerneq). Napparsimasunik soraarummeersitsineq aggustimi-septembarimi ingerlanneqartassaaq. Ilinniartitaanermut Naalakkersuisoqarfik pineqartut saniatigut ukiup ingerlanerani piffissani allani soraarummeertoqarnissaanut akuersisinnaavoq.

*Imm. 3.* Misilitsinnerit aaqqissuunneqarlutillu ingerlanneqartassapput kapitali 6-imi tamatumunga tunngasumik aalajangersakkat naapertorlugit.

**§ 59.** Imminnut ilinniartittut misilitsinnissaannut piffissarititap ilinniarnertuunngorniarnarfiit imaluunniit ilinniarnarfiit akuerisaasumi ilinniartitsissummik pineqartumik misilitsinnermut piffissarititaq malissavaa.

*Imm. 2.* Imminut ilinniartittup nammineerluni ilisimasassavaa qaqugukkut misilitsittoqassanersoq.

**§ 60.** Naliliineq ingerlanneqartassaaq oqaluttariarsorluni misilitsinnertigut, allattariarsorluni misilitsinnertigut, ilinniarnermi suliaqarnikkut, ajornanngippat suliaqarluni misilitsinnikkut aammalu ajornanngippat pisimasuutitaliornikkut.

**§ 61.** Misilitsinnerit aaqqissuunneqassapput ataatsimut isigalugu ilinniartitaanerup siunertaanut naapertuuttumik ilinniartullu ataasiakkaarlutik nalilersorneqarnissaannik isumannaarisumik.

**§ 62.** Ilinniarnertuunngorniarnarfik ilinniarnertuunniit akuerisaasoq ilikkagassatut pilersaarutaasunut maleruagassat naapertorlugit misilitseriaatsit assigiinngitsut akornanni toqqaasinnaappat, toqqaaneq ilinniartumut atugassarititaasut pissutsillu atuuttut eqqarsaatigalugit pissaaq.

**§ 63.** Pikkorissaaneq 1. semesterip naanerani soraarummeerneramik imaqarsinnaavoq, taamaattoq taamaallaat Kulturilerineq pillugu ilinniartitsissummut C-mut tunngatillugu. Pikkorissaaneq ukiumi atuarfusumi ilinniartitsissutip naammassineqarnissaa sioqqullugu soraarummeerneramik imaqarsinnaavoq.

**§ 64.** Ilinniarnertuunngorniarnarfup imaluunniit ilinniarnertuunniit akuerisaasup ilinniartitsinnermi pikkorissaaneq tamarmiisoq aaqqissuutissavaa uku eqqarsaatigalugit:

- 1) ilinniartitsissummi ataatsimi nalunaaquttap akunneri atuartitsiviusussat tamarmik ingerlanneqarsimanissaat piffissap soraarummeerfusussap aallartinneqannginnerani, aamma
- 2) ilinniartitsissut allattariarsorluni oqaluttariarsorlunilu misilitsinnermik naggaserneqassappat pikkorissartup misilitsinnerup ilaanik allattariarsorluni oqaluttariarsorlunilu soraarummeernissaa.

**§ 65.** Pikkorissartut imminnut ilinniartittut misilitsinnissamut nalunaaruteqartut ingerlaannartumik misilitsissapput.

*Imm. 2.* Pikkorissartuq ilinniartitsissummik ataatsimik arlalinnilluunniit misilitsikkusunngikkuni piffissap soraarummeerfusussap aallartinneqannginnerani piaarnerpaamik nammineerluni peqataanianninnini nalunaarutigissavaa.

*Imm. 3.* Imminnut ilinniartittut pikkorissarnissamut allatsissimangitsut imaluunniit siusinnerusukkut allatsissimasut namminneerlutik pikkorissarnissamut peqataarusullutik nalunaassapput.

**§ 66.** Soraarummeernissamut peqataarusulluni peqataarusunnanilu nalunaarneq pissaaq ilinniarnertuunngorniarnarfimmu imaluunniit ilinniarnertuunniit akuerisaasumut pikkorissartut allatsiffigisimasaanut saaffiginninnikkut.

**§ 67.** Misilitsinnissamut peqataarusulluni nalunaarneq pissaaq aasaanerani soraarummeernissaq sioqqullugu kingusinnerpaamik ulloq 15. december, ukiorlu taanna ukiukkut soraarummeernissaq sioqqullugu kingusinnerpaamik ulloq 15. august.

*Imm. 2.* Ilinniartitsissummik soraarummeeruteqarnissamut taamaallaat nalunaaruteqartoqarsinnaavoq ukiuni pingasuni ilinniarnertuunngorniarnertup piffissami pineqartumi inaarutaasumik misilitsiffiunerani.

*Imm. 3.* Pikkorissartut Ilinniarnertuunngorniarluni ilinniakkami naliliisarneq aamma uppersaasiisarneq pillugit Namminersorlutik Oqartussat nalunaarutaanni § 32 naapertorlugu ilinniarnermi suliaqarusuttut suliaasat aallartinneqarnissaat kingusinnerpaamik qaammatinik marlunnik sioqqullugu nalunaaruteqassapput. Ilinniarnermut atatillugu taamaallaat suliaqartoqarsinnaavoq ilinniarnertuunngorniarfiup imaluunniit ilinniarsiup akuerisaasup ilinniarnermut atatillugu sulianik allanik isumannaarinerani.

**§ 68.** Pikkorissartut imminnut ilinniartittut inissisimasut imaluunniit imminnut ilinniartittuusut ilinniarnertuunngorniarfimmil ilinniartitsissutinik ataasiakkaanik ilassutitullu ilinniagassanik ilinniagaqarnissamut ilaatinneqanngillat ilinniarnertuunngorniarfimmilu ilinniartitsinermut malinnaanissamut pisussaataatanatik.

**§ 69.** Censori ilisimatinneqassanngilaq misilitsinnermut peqataasup imminnut ilinniartittut misilitsinnermut ilaatinneqarnera pillugu.

## **Kapitali 7**

### *Uppersaasiineq*

**§ 70.** Ilinniartup soraarummeerluni angusereernermini pissarsiarissavai ilinniartitsissutinik ataasiakkaanik imaluunniit ilassutitullu ilinniagassanik ilinniagaqarsimanermut uppersaasat imaluunniit ilinniartitsissutini ilinniartup ilinniartitsissutinik ataatsimoortunik naammassiffigisimasaani soraarummeernermi uppersaasat karakterinik imallit.

*Imm. 2.* Ilinniartitsissutinik ataasiakkaanik ilassutitullu ilinniagassanik ilinniagaqarsimanermut uppersaasat imarissavai ilinniartitsissummi imaluunniit ilinniartitsissutini ilinniartup naammassisimasaani angusanut tunngatillugu karakterii aamma ilinniarsiup iluani misilitsinnermi karakterii kiisalu kisimiilluni ilinniarnermi suliaanut tunngatillugit karakterii.

*Imm. 3.* Ilinniartitsissutinik ataasiakkaanik ilassutitullu ilinniagassanik ilinniagaqarsimanermut uppersaasat allanneqassaaq ilinniartup imminnut ilinniartittut inissisimasimaneq, tak. § 6, imm. 1-imi malittarisassat.

*Imm. 4.* Ilinniartup ilinniartitsissutit ataasiakkaat katiterlugit ilinniarnertuut soraarummeersimangippat ilinniartitsissutini ilinniartup naammassisimasaani karakterit agguaqatigiissillugit naatsorsorneqassanngillat.

**§ 71.** Ilinniartup ilinniartitsissutit ilinniakkap sammivissaatut toqqarsimasami ilaasut tamaasa malinnaaffigisimappagit ilinniagassatut toqqakkami ilinniartitsissummut qaffasissusermullu assingusumik ilinniartup angusaqarsimappat ilinniarnertuunngorniarfiup imaluunniit ilinniarsiup akuerisaasup ilinniartitsissutini ataasiakkaani ilinniarnertuut soraarummeernermi uppersaasat tunniutissavaa.

**§ 72.** Ilinniartup inaarutaasumik misilitsissimanatik ilinniarnermi unitsitsippata ilinniartup piimasaqarneratigut ilinniarnertuunngorniarfik imaluunniit ilinniartitsissutit akuerisaasup uppersaasat suliaqassaaq. Uppersaasat takuneqarsinnaassapput ilinniartitsissutit sorliit ilinniartup peqataaffigisimaneq, ilinniarnermi ilaanik naammassinnissimanermut uppersaasat, ingerlaavartumik

nalilersuisarnermit angusat kiisalu paasissutissat allat ilinniartup nalilersuinermit tamarmiusumut ilaatikkusutai.

*Imm. 2.* Ilinniakkamik naammassinnissimanermit uppersarsaammik tunineqassagaanni piunasaqaataavoq ilinniartup ilinniarnermi peqataanissamut ilinniarnermi ileqqorissaarnissamullu malittarisassanik malinninnissamut piunasaqaatinik naammassinnissimanissaa.

**§ 73.** Ilinniartuq ilinniartitsissummi assigiimmik qaffasissusilimmi arlaleriarluni misilitsissimaguni, soraarummeernermilu karakterit pillugit naammagittaalliuuteqarnerata malitsigisaanik aamma ilinniartup uppersarsinnaappagu ilinniarfigerusutamut isissagaanni karakterit aalajangersimasut anguneqarsimasussaasut misilitseqqinnermi angusarineqartut soraarummeernermi uppersarsaammut ilanngunneqassapput.

**§ 74.** Ilinniarnerp soraarummeerutigineqarnerata kinguninnguatigut ilinniarsimanermit uppersarsaat tunniunneqassaaq.

**§ 75.** Naliliisarneq uppersarsaasiisarnerlu pillugit malittarisassat allat Ilinniarnertuunngorniarluni ilinniakkami naliliisarneq aamma uppersarsaasiisarneq pillugit Namminersorlutik Oqartussat nalunaarutaanni § 5-imi, § 7-imi, §§ 23-38-ni, § 42-mi, § 43, imm. 1-imi aamma 2-mi, §§ 44-54-ni, §§ 69-82-ni, § 85-imi, § 86-imi, § 97-imi aamma § 98-imi malittarisassat malippaat.

## Kapitali 8

### *Naammagittaalliuuteqarsinnaaneq aningaasalersuinerlu*

#### *Naammagittaalliuut*

**§ 76.** Ilinniartuq imaluunniit ilinniartuq angajoqqaatut oqartussaaffigineqarpat angajoqqaatut oqartussaasut nalunaarut manna naapertorlugu rektorip imaluunniit ilinniarfiup akuerisaasup pisortaata aalajangiineranik, aalajangiinerup nalunaarutigineqarneranit sapaatit akunneri marluk qaangiutsinnagit Ilinniartitaanermit Naalackersuisoqarfimmut inaarutaasumik aalajangiisussamut naammagittaalliuuteqarsinnaapput.

*Imm. 2.* Naammagittaalliuut tunngavilersorneqarsimassaaq.

*Imm. 3.* Naammagittaalliuut imm. 1-imi naammagittaalliornissamut piffissarititaq qaangiutsinnagu ilinniarnertuunngorniarfimmi rektorimut imaluunniit ilinniarfimmi akuerisaasumi pisortamut allaganngorlugu tunniunneqassaaq, rektorip pisortalluunniit naammagittaalliuut Ilinniartitaanermit Naalackersuisoqarfimmut suliamut tunngatillugu oqaaseqaatiminik ilalerlugu ingerlateqqissavaa. Suliap ingerlateqqinneqannginnerani ilinniarnertuunngorniarfimmi rektorip imaluunniit ilinniarfimmi akuerisaasumi pisortap naammagittaalliuuteqartoq sapaatip akunnerata ataatsip ingerlanerani oqaaseqaammut oqaaseqaateqarnissamut periarfississavaa. Naammagittaalliuuteqartup oqaaseqaatigisinnaasai ilanngullugit Naalackersuisoqarfimmut nassiunneqassapput.

*Imm. 4.* Rektorip imaluunniit ilinniarfimmi akuerisaasumi pisortap aalajangiinerata allangortinneqannginnissaa pillugu imm. 1-imi piunasaqaatit eqqortinneqanngippata maalaarutip itigartinneqarnissaanik, maalaaruteqartoq ilalerlugu aalajangiinerup allangortinneqarnissaanik

imaluunniit aalajangiineq suliareqqitassanngorlugu rektorimut imaluunniit ilinniartimmi akuerisaasumi pisortamut uterteqqinnissaanik ilinniartitaanermut Naalakkersuisoqarfik aalajangiisinnaavoq.

*Imm. 5.* § 35, imm. 1 naapertorlugu iliuseqarnissamik aatsaat aalajangiisoqarsinnaavoq ilinniartuq ilinniartorlu angajoqqaatut oqartussaaffigineqarpat taassuma angajoqqaatut oqartussaasui piffissaqartitsilluarluni tusarniaaffigineqarsimappata. Tusarniaanermi piffissaliussaqaq nalinginnaasumik tusarniaavigineqartussamut nalunaaruteqarnermiit ullunik marlunnik sivilisunerusariaqanngilaq, taamaattoq tak. Ilinniarnertuunngorniarni ilinniarnermut ileqqorissaarnermullu malittarisassat pillugit Namminersorlutik Oqartussat nalunaarutaanni § 10, imm. 3.

#### *Aningaasalersuineq*

**§ 77.** Ilinniartitsissutinik ataasiakkaanik ilassutitullu ilinniagassanik ilinniagaqarneq akeqanngilaq ilinniartup uppersarsinnaappagu ilinniagassamut aalajangersimasumut ilinniartup kingusinnerusukku ilinnialerusutaanut tunngatillugu ilinniartitsissut piginnaasaqalissutaasussaasoq.

*Imm. 2.* Ilinniartitsissutinik ataasiakkaanik ilassutitullu ilinniagassanik ilinniagaqarneq akeqanngilaq ilinniartuq piginnaasaqalissutaasusamik siusinnerusukku ilinniagaqarsimanngippat.

*Imm. 3.* Ilinniartuq ilinniagaqarnissamik siunnerfeqarani ilinniartitsissutinik ataasiakkaanik ilassutitullu ilinniagassanik piginnaangorsaataasumik ilinniagaqarusukkuni nammineerluni ilinniarnerniit akiliuteqassaaq.

**§ 78.** Imminnut ilinniartittut siusinnerusukku ukiuni pingasuni ilinniarnertuunngorniarnermi imaluunniit ilinniartitsissutinik ataasiakkaanik ilassutitulluunniit ilinniagassanik ilinniagaqarsimanngitsut imaluunniit tiguneqarsimanngitsut soraarummeernerannut atatillugu akiliisineqarsinnaapput.

*Imm. 2.* Akiliutissap annertussusissaa ilinniartitaanermut Naalakkersuisoqarfimmit aalajangersarneqassaaq ilinniartitsissullu ilinniartup malinnaaffigerusutaa sorliunersoq apeqputaalluni akiliutissap annertussusaa nikerarsinnaavoq.

*Imm. 3.* Akiliutissaq ilinniarnertuunngorniarnimmit imaluunniit ilinniartimmi akuerisaasumit soraarummeertitsisumit akileqquneqassaaq.

*Imm. 4.* Akiliutissap annertussusaa tamanut saqqummiunneqassaaq.

#### *Atortuulersitsineq ikaarsaarnermilu aalajangersakkat*

**§ 79.** Nalunaarut atortuulersinneqarpoq ulloq 1. december 2016.

**§ 80.** Nalunaarut 1. august 2016-ip kingorna pikkorissarlutik aallartittunut atuutsinneqassaaq.

*Namminersorlutik Oqartussat, ulloq 17. november 2016*

Doris Jakobsen

Mikael Kristensen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut